



DEO OPTIMO MAX.
UNI ET TRINO,

VIRGINI DEI - PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS
*manè discutienda, in Scholis Medicorum, die Mercurii decimâ-nonâ
mensis Maii, anno Domini M. DCC. LI.*

M. LUDOVICO-ALEXANDRO VIEILLARD,
Doctore Medico, Præsîde.

An menstrua purgatio in lactantibus noxia?

I.



UOD à parentibus sanis & vegetis ortum ducat
homo, hoc summum Naturæ munus. Diù namque
durat domus bonis nixa fundamentis: debilibus
verò & caducis si fulciatur, citò nutat, citò corrui-
t. At frustrâ quis talibus gauderet rudimentis, quæ
primâ in dies non roborarentur *diætâ*. Hujus autem pars optima

A

lac , præsertim muliebri ; hinc summâ cautione opus in seligendis nutricibus , quibus lactandi credantur pueri. Quod quidem opus , soli & prudenti Medico fidendum , mulierculis plerumque , fatali nescio quo abusu , committitur. Non sanè tutos à redargutione putavero parentes , qui , dùm sciunt à primis vitæ diebus judicandam esse futuram valetudinem , in re gravis adeò momenti vel levissimè peccant. Quænam porrò dotes à lactantibus exigendæ ? Quænam mulieres ab hoc implendo munere arceandæ ? Infinitæ. Non tamen illas rejecero , in quibus , aliundè sanis , redundat fucci boni copia.

I I.

ETSI nocet omne nimium in corpore humano , tamen ubi nimium hoc absque ullo machinæ dispendio eliminari potest , jam non nocet. Sanguinem irrorat uberius serum , quàm ut possit debitâ quantitate , perspiratione insensili avolare ; largior urina fecernitur , frequentius spuitur. *Boni habitus ad summum progressi statim solvendi* , ait Hippocrates. Quid refert quonam modo solvantur ? Homini valentissimo sanguis modicus è naribus aut è venis hæmorrhoidalibus effluit ab epulis lautissimis. Quid inde mali patietur ? In talibus natura , leni conatu , disturbat ea quibus , etsi bonis , forsàn obrueretur , si diutius eadem pateretur in statu , aut si vel levissimum caperent incrementum : quid ab arte prudentius expostulandum ? Modo non absimili res in lactantibus peraguntur : ubera plurimo lacte turgida non siccant tota puer ; erumpunt menstrua , quisnam à lactando talem arcebit nutricem ?

III.

EVANUIT jam à longo vetus illud præjudicium , quo humori menstruo contagiosa quædam indoles assignabatur. Nemini non notum est sanguinem ex utero stillantem , omninò simillimum esse cætero sanguini ; quod si talis excretio intempestivè suppressa aut retardata , diros adeò cieat tumultus , non certè ideò quòd aliquo *miasmate* humores inficiat ; sed quòd notâ sibi & familiari viâ expellere non potuerit natura , residuum ex nutritione , aliisque secretionibus. Hinc opibus suis onerata fatiscit. Porro si talis sit hæc excretio ut in statu naturali abesse

non possit absque maximo discrimine : quodnam poterit mali portendere , in quocumque statu sano ? Data mulier , dùm lactat , cibis solito succulentioribus vescitur , quidpiam de suo dēmit exercitio , paulò minùs transpiratione deperdit : alimenta sic coquit , ut omnem omninò succum alibilem ex illis extrahat : maximam lactis optimi copiam fugenti propinat : totum puer non ebibit ; residuum ad communem fluidorum alveum revehitur , sicque in dies auctior sanguinis massa , tandē aliquā viā erumpere gestit : quānam tutiori , præter uterum , natura superfluum exonerabit ? Multò quidē magis & lactanti , & puero commendum censeremus , si , quod utero extruditur , aut mammis , aut alteri organo secernendum apponeretur. Quid plura ? Mulieres lactare docuit dura necessitas. Alio si possint pasci modo pueri , jam cessat tale ministerium : possunt ergò mulieres à lactando abstinere. Menstruam verò , ipsa sibi paravit natura purgationem , quā carere non potest absque imminente suo discrimine. Ergone , quod sibi in tutissimum juvamen elegit tam bona parens , aliquandò noxium poterit experiri ?

I V.

A primo vitæ exordio repetenda hominis valetudo. Sit ergò *nutrix* nata salubriter. Ipsa bonam suxerit *nutricem* : puorum morbos aut eluserit , aut alacrius passa sit. Toto infantiae decursu ætatis suæ ludos amaverit , iisdem abundè indulserit. Laudabilibus interim usa sit alimentis. Menses ipsi non magno molimine eruperint : ab ipsa eruptionē , ordine constantissimo recurrerit hæc purgatio. Mens ipsi fuerit hilaris : quæ sunt amara & molesta senserit , sed leviter. Venereos amplexus fugerit , usque dùm corpus totum adeptum sit incrementum. Tertio aut quarto mense à primis amplexibus conceperit. Gestationis tempore concubitum , *neque nimis pertimuerit , neque nimis concupiverit*. Ingrata fugerit , jucunda modestè gustaverit. Otium vitaverit , debito indulserit exercitio. Sex primis à partu hebdomadis satiaverit se victu tenui & potu diluenti : crassioribus postea alimentis interdum nutrita sit. His si addantur statura mediocris ; corpus nec obesum nec gracilius , cutis alba , igne paucio scintillantes oculi , dentes albissimi , mammae neque depressæ , neque turgidiores , in habitu & ornatu elegans concinnitas ; certè qui tenet hanc , tenet & *nutricem* ipsis Principibus lactandis aptissimam.

4

Sic natæ mulierī, quo tempore lactat, menses superveniant; quisnam Medicorum ejusmodi excretionem perniciosam judicaverit? Nullus sanè: nec erit qui hanc succi boni exuperantiæ deberi diffiteatur.

V.

MULTO lacte tumentibus mammarum glandulis, vasa perenni compressione coarctata, minus liberè sanguis permeat: hinc ad alia derivetur necesse est. Tale autem est inter mammarum & uteri vasa consortium, ut his *plethoricis* altera turgescant, depletis verò flaccescant, & vice versâ: hinc in plerisque lactantibus, ex parietibus uteri perpetuum humoris serosi stillidium. Ejusmodi jacturam non norunt, quæ dum lactant, menstruam purgationem experiuntur. In his videlicet uterī vasa multò solidiora, difficiliùs hiant quàm rumpuntur. Hæ excretionem naturæ legibus consonam patiuntur, aliæ morbum. Quicquid obganniat ignara plebs, caveant Medici, ne tales à lactando mulieres arceant, nisi hancce excretionem à quodam morbo oriundam esse, maturo ipsis pateat examine. Porro si in lactantibus nihil habeat in se mali menstrua purgatio; si nihil afferat mutationis in corpore, quis non concluderet?

Ergò menstrua purgatio in lactantibus non noxia.

Proponebat Parisiis CAROLUS GILLOT, Barroductæus
Tullensis, Saluberrimæ Facultatis Medicinæ Parisiensis
Baccalaureus, A. R. S. H. 1751,
A SEXTA AD MERIDIEM.

Typis QUILLAU, Universitatis & Facultatis Medicinæ Typographi, 1751.